

In Engiadina Bassa daja üna vasta spüerta per persunas chi chüran a lur confamiliars. Duos peritas han infuormà d'incuort a Scuol davart ils differents servezzans ed han dat divers cussagls.

La società Amias ed Amis da l'Ospidal d'Engiadina Bassa ha invidà a sia segunda sairada cun referat. Il local da cultura dal Bogn Engiadina a Scuol s'haja survgni in mardi saira infuormaziuns davart la chüra da confamiliars. Lapro han provà Ursula Pedotti da Ftan e Sylvia Parth dal post da cussagliaziun da chüra dal Center da sandà Engiadina Bassa (CSEB) da dar resposta a la dumonda scha quai es plaschair, dovair o üna chargia e schi's das-cha eir dir da na?

La seria da referats ha lö amo fin in favrer da l'on chi vain. Üna jada al mais vain organisada üna sairada d'infuormaziun, a quellas sun invidats ils commembers sco eir il public interessà da l'Engiadina Bassa.

Evitar d'esser sfini

Suvent chüran ils confamiliars sco il partenari, las figlias o ils figls e las brüts a gliעד attempada fin chi sun sves sfinits. Perquai faja dabsögn da far par temp las ponderaziuns bsögnaivlas per ün bun equiliber tanter ils bsögns dals attempats, dals agens bsögns e da las aignas forzas. Lapro ston gnir scleridas dumondas co cha la prestaziun dess gnir bunifichada, che pussibilitats da l'agüd ambulat chi sun avantman o eir cur ch'üna chüra

staziunara es indichada.

«Plü bod abitaivan in Engiadina Bassa per regla trais generaziuns suot ün tet e la chüra dals confamiliars tocchava pro la lavur dal minchadi», ha manzunà Ursula Pedotti in sia introducziun. Ella ha lavurà 25 ons sco cusgliadra pro la Pro Senectute d'Engiadina. Da l'on 1956 haja lura dat cun la Dmura Chasa Puntota a Scuol la prüma instituziun ingio cha gliעד in età avanzada pudaiva chattar ün nouv dachasa. «Da quel temp natüralmaing sainza ün servezzan da chüra e pel solit sainza ün lö per persunas chi vaivan pers las structuradas üsitàdas e lur partenari», uschè Pedotti. Las statisticas demograficas muossan, cha la gliעד vain adüna plü veglia e voul restar plü lönch pussibel in seis agen ambiaint.

Sclerir ouravant ils bsögns

«Id es important da sclerir ouravant che chi fa tuot dabsögn per ch'üna chüra da confamiliars a chasa possa gnir realisada in ün möd equilibrà per tuot ils pertocs», ha dit Ursula Pedotti. Tenor sias experiencias cumainza quist servezzan cun piculezzas sco l'accompagnamaint pro'l meidi, güdar a far las cumischiuns e cuntinuantamaing vegnan pro ulteriurs agüds. Sylvia Parth dal post da cussagliaziun chüra CSEB ha cusglià da dumandar agüd par temp: «Nus pudain cusgliar, güdar ed organisar l'agüd bsögnaivel per schligerir a quellas persunas chi sun confruntadas directamaing culla chüra.»

Quists servezzans tendeschon da manar in chasa il giantar, far transports o lura servezzans da chüra tras l'organisaziun da Spitex.

Tuottas duos peritas sun da l'avis cha la persuna chi chüra haja il dret da definir seis bsögns e d'exprimer seis cunfins persunals. «I nu's das-cha invlidar da reglar cun l'agüd d'ün contrat tuot las dumondas finanzialas e las indemnisaziuns da la persuna chi chüra il confamiliars.» Eir in quist connex daja perits chi pon güdar in chosa. «Min- chatant douvra eir ün accompagnamaint pro'l process dal müdamaint da las rollas», ha dit Sylvia Parth, ed: «I nu sun plü ils genituors chi pisseran pels uffants, dimpersè ils uffants ston surtour quist'incumbenza.» (anr/afi)



Ursula Pedotti e Sylvia Parth (da schnestra) han infuormà davart ils differents servezzans per quellas persunas chi chüran lur confamiliars.
fotografia: Annatina Filli

Üna società chi sustegna

Dal 2003 es gnüda fundada la società Amias ed Amis da l'Ospidal d'Engiadina Bassa. L'intent da la società es da promover pro la populaziun la fiduzcha in lur agen ospidal e da til render cuntschaint eir pro'ls giasts. Plünavant sustegna la società ils bsögns pratics e da materials da l'ospidal e metta a disposiziun ils mezs finansials per progets a favur dals paziants e dals collavuratuors. La società dombra bundant 300 commem-bras e commembers chi derivan per gronda part da l'Engiadina Bassa, ma eir d'ulteriuras parts da la Svizra. Presidenta da la società es Seraina Bickel da Susch. Ils ulteriurs commembers da la suprastanza sun Urs Trottmann da Scuol, Seraina Bezzola da Zernez, Martin Büsing da Scuol, Annina Mengiardi d'Ardez, Fadri Häfner da Guarda, Erna Koller da Scuol e Joachim Koppenberg sco rapreschantant da la direcziun da l'Ospidal.
(anr/afi)